

摘藻堂四庫全書薈要

集部

欽定四庫全書薈要

集部

御定歷代賦畧外集卷十八

七

欽定四庫全書薈要卷一萬七千三百七十六

集部

御定歷代賦彙外集卷十七

情感

笑賦

晉孫楚



有度俗之公子總萬物之細故心髣髴乎巢由以得意

為至樂不拘戀乎凡流會親戚於高宇結宗盟於綢繆  
所以交頸偃仰椎胸指掌亢洪聲於通谷順長風以流  
響氣參譚以相屬若將頽而復往或顰蹙俛首狀似愁

悲怫鬱唯轉呻吟郁伊或攜手悲嘯噓天長叫遲重則  
如陸沉輕疾則如水漂徐疾任其口頰間合得乎機要  
或中路背叛更相毀賤傾倚叵我彫聲迄乎日晏信天  
下之笑林調謔之巨觀也

歡賦

有序

明屠隆

余處冗賤百憂煎人側身天地長苦跼踖思欲揮悶散  
心寄興楮墨我思古人動多憂戚昔士衡歎逝文通賦  
恨驚心動魄一字一歎每一披覽秋氣颼颼風雨欲來

使人惻愴幾不知有生人之樂矣友人馮夢禎謂僕曰  
子何不為歡賦悅心暢意破彼我之煩懣宣萬物之鬱  
塞則此道貴矣夫愁苦之語易好歡娛之言難工然烏  
可以其難而含毫喪沮也於是為賦焉文通諸君子見  
當掩口

晨登山阿下覽八紘天地開朗風月熹明遊人出嬉川  
塗載平於是僕本曠士解顏暢鬱首慮盡捐萬愁若失  
我思古人歡情靡一娟娟皇娥夜處璇閨薄焉遵渚帝

子是依精靈感化中心不違清歌相答游漾忘歸軒轅  
守和冥心合道夢遊華胥萬國熙皞終登空同後天地  
老子晉天才神骨蕭爽丹經既成捫霞直上羣靈爽猶  
九州冀壤薄富貴而不懷希世外之幽賞英英穆滿志  
狹乾坤萬里煙霧八駿雷奔謁西王母登彼崑崙奏白  
雲之長謠俯弱水而歷天門秦家公主氣凌紫氛一當  
蕭史遂厭人羣攬虹霓而作珮製丹霞以為裙睇樓上  
之明月躡天邊之彩雲長辭綺閣永隨夫君千秋萬歲

此樂何云越王破吳奏凱言歸載蛾眉於金車挂將士  
以錦衣樓船壓江濤朱旗晃日輝緹騎填乎廣陌羅綺  
盈於中閨堂上燭滅笙歌不喧尊罍酒清房櫳月昏閣  
者出客主人留髡坐細毳以中夜傾一石而何言至若  
漢帝英雄初誅項王山河入掌弓矢斯藏過豐沛兮訪  
故偕父老兮徜徉歌大風而慷慨覽雲氣之飛揚又如  
延年獻歌夫人初御驚玉骨之凝霜豔輕綃之如霧樓  
閣含風階除墜露洵明珠之照人判傾城於一顧衛霍

出塞士馬精強匈奴滅漢道昌黃金朱第列侯煌煌鈿  
釵作隊歌舞成行相如弄琴文君私喜臨邛夜亡成都  
歸市姿態豔目芙蓉心死紅蘭茁芳砌青苔生玉祀雖  
貧賤其何傷願百齡以為矢若夫太液波明昭陽月滿  
香蓮罨舟涼風送管黛色欲絕歌聲乍緩既和媚而魂  
癡亦宛麗而心斷兔園既開梁王意歡碧瓦宵白朱門  
夜寒集詞客之鴻藻驅凍雲於毫端孟德芟除四方萬  
萊雄圖既就猛士歸來引漳河以為池鑄銅雀以為臺



清吹干雲步輦轟雷高歌烈士泰山崔嵬陳王妙才應  
劉卓犖寶馬金羈光輝歷落出馳東郊歸宴平樂神飈  
蕩空青山暎閣會稽諸賢遠覽高步山川崩峭雲物莽  
互喬松夾道修篁繞戶一詠一觴凌虛徑度庾公風流  
作鎮武昌挾賓佐娛景光覽明月登胡牀酣飲其無人  
代長嘯而下天霜又有征夫戍邊思婦含悽長想忽見  
遠行乍歸今夕何夕月白星輝高堂敞兮春溶溶朱簾  
捲兮秋漫漫新婚合兮出瓊珮佳期至兮藉芳蘭金鑪

分乍燄紅燭兮未殘莫不款爾彌洽爽焉和愉寸腸不  
結雙眉長舒知離憂之為何物豈羨夫神仙之所居

恨賦

梁江淹

試望平原蔓草縈骨拱木斂魂人生到此天道寧論於  
是僕本恨人心驚不已直念古者伏恨而死至如秦帝  
按劍諸侯西馳削平天下同文共規華山為城紫淵為  
池雄圖既溢武力未畢方架鼉鼉以為梁巡海右以送  
日一旦魂斷宮車晚出若乃趙王既虜遷於房陵薄暮

心動昧旦神興別豔姬與美女喪金輿及玉來置酒欲  
飲悲來填膺千秋萬歲為怨難勝至如李君降北名辱  
身冤拔劍擊柱弔影慙魂情往上郡心留鴈門裂帛繫  
書誓還漢恩朝露溘至握手何言若夫明妃去時仰天  
太息紫臺稍遠關山無極搖風忽起白日西匿隴鴈少  
飛岱雲寡色望君王兮何期終無絕兮異域至迴敬通  
見抵罷歸田里閉關却埽塞門不仕左對孺人右顧稚  
子脫畧公卿跌宕文史齋志沒地長懷無已及夫中散

下獄神氣激揚濁醪夕引素琴晨張秋日蕭索浮雲無  
光鬱青霞之奇意入修夜之不暘或有孤臣危涕孽子  
墜心遷客海上流戍隴陰此人但聞悲風汨起血下霑  
襟亦復含酸茹歎銷落湮沉若迺騎疊跡車屯軌黃塵  
匝地歌吹四起無不煙斷火絕閉骨泉裏已矣哉春草  
暮兮秋風驚秋風罷兮春草生綺羅畢兮池館盡琴瑟  
滅兮丘隴平自古皆有死莫不飲恨而吞聲

擬恨賦

唐李 白

晨登太山一望蒿里松楸骨寒宿草墳毀浮生可嗟大  
運同此於是僕本壯夫慷慨不歇仰思前賢飲恨而歿  
昔如漢祖龍躍羣雄競奔提劍叱咤指揮中原東馳渤  
澥西漂崑崙斷蛇奮旅掃清國步握瑤圖而倏昇登紫  
壇而雄顧一朝長辭天下縞素若乃項王虎關白日爭  
輝拔山力盡蓋世心違聞楚歌之四合知漢卒之重圍  
帳中劍舞泣挫雄威雖分不逝喑啞何歸至如荆卿入  
秦直度易水長虹貫日寒風颭起遠饌始皇擬報太子

奇謀不成憤惋而死若夫陳后失寵長門掩扉日冷金  
殿霜淒錦衣春草罷綠秋螢亂飛恨桃李之委絕思君  
王之有違昔者屈原既放遷於湘流心死舊楚魂飛長  
楸聽江風之嫋嫋聞嶺猿之啾啾永埋骨於淶水怨懷  
王之不收及夫李斯受戮神氣黯然左右垂泣精魂動  
天執愛子以長別歎黃犬之無緣或有從軍永訣去國  
長違天涯遷客海外思歸此人忽見愁雲蔽日目斷心  
飛莫不攢眉痛骨拔血霑衣若乃錯繡轂填金門煙塵

曉杳歌鐘晝喧亦復星沉電滅閉影潛魂已矣哉桂華  
滿兮明月輝扶桑曉兮白日飛玉顏滅兮螻螳聚碧臺  
空兮歌舞稀與天道兮共盡莫不委骨而同歸

擬恨賦

有序

明李東陽

昔余少讀江淹李白所作恨賦愛其為辭而怪其所為  
恨多閨情閤怨其大者不過興亡之運成敗之常而已  
是何感於情亦奚以恨為哉中歲以來更涉世故記憶  
舊聞忠臣孝子奇勲盛事或方值幾會遽成摧毀失之

金史卷八十八  
毫釐而終身曠世不可復得至令人吞聲搥腕而不能  
已聖賢不言恨然情在天下而不為私亦天理人事之  
相感激雖以為恨可也乃效江李體反其為情以寫抑  
鬱而卒歸於正知我罪我皆有所不避云其辭曰

仰視大塊流觀古今撫陳編之磨滅悲往跡之銷沉或  
事幾之幸會或禍敗之相尋感志士之涕淚傷善人之  
龔瘖若乃國士報怨吞炭漆身遺恨飲器潛身水濱部  
馬為之驚跼賊徒為之崩奔奮仇衣於一劍墮血怨於



千春威橫強秦怨深鄰國壯士夜奮神椎晝擊山嶽為  
之增氣天地為之變色歎失手於副車僅逃形於大索  
陳實秉政誓清濁亂推席定謀露章請斷機事暗泄禁  
軍坐畔塞宇宙於煙氛墮衣冠於塗炭昭烈繼絕武侯  
託孤勇復漢祚雄吞魏都陳二表之宏畧運八陣之奇  
謨忽將星之淪落悲帝業之榛蕪武廟將建唐社幾屋  
雖少海之潛龍返虞淵之日轂二豎伏法五王就戮功  
甫收於藥籠禍終留於肌肉建中失母感慨天衷顧衮

衣與玉食嗟欲養而無從誤承歡於別輦翻飲怒於深  
宮冀百敗於一得竟忍慟而長終靖康入寇岳侯奮矛  
復中原於破竹誓決策於焚舟神禡奸魄天遺國讐痛  
長城之自壞委社稷於橫流胡騎南驅江沙夜駐苦兵  
力之不支幸潮來之有處海若助虐坤靈失據豈二儀  
之翻覆莽萬物之非故已矣乎江山改兮人民非白日  
黯兮陰風淒時不可乎再得歎浮生兮曷歸駭餘聲於  
壁碎佇滅景於雲飛事難成而易敗世寡合而多違矢

修正以俟命孰利鈍之可期庶人定以天勝終韓旋於  
化機

泣賦

梁江淹

秋日之光流兮以傷霧離披而殺草風清冷而繞堂視  
左右而不暖具衣冠而自涼默而登高谷坐景山倚桐  
柏對石泉直眊百里處處秋煙閑寂以思情緒留連江  
之永矣蓮欲紅南有喬木葉以窮心蒙蒙兮恍惚魄漫  
漫兮西東詠河兗之故俗春徐揚之遺風春徐揚兮阻

關梁詠河究兮路未央道尺折而寸斷魂十逝而九傷  
歛潺湲兮沫袖泣嗚咽兮染裳若夫景公齊山荆卿燕  
市孟嘗聞琴馬遷廢史少卿悼躬夷甫傷子皆泣緒如  
絲詎能仰視鏡終古而若斯況余輩情之所使哉

別淚賦

明張明弼

白雲在天黃花滿枝與子一別相見何時況燕婉兮情  
纏乍荆吳兮路隔天一碧而愁長野四青而怨積風遷  
嶺而殊音雲換川而同色川多去權嶺有還鑣別衫齊

挽離目雙挑零花戀葉斷梗懷條攀鮮顏兮潤落傷綠  
實兮朱銷慘子之衿招子之心余何為兮煩忡君奚事  
兮沉吟水深深兮可涉山高高兮可越袂一判兮萬里  
盼暫回兮千日哀緣心兮忽來淚向君兮難絕乃其雙  
眉全下半臉微迎鬟低黛接面轉紅生黛隨恨滴紅入  
啼明珠光流而粉破玉豔發而筋橫爾復弱腕難加苦  
言欲語似蝶影之縈絲恍鶯聲之雜雨指渺渺之雲天  
顧茫茫之煙樹余從何去君向何迴雲天誰辨煙樹空

猜願征筵兮合怨畏歧路兮分哀引目幾傳含聲一咽  
睽死青停脣融朱結燭溜未枯綠痕如接拭絳綃而化  
殷落素盤而成血著闌竹而文生捻盆枝而癡出影入  
鏡而雙啼露將花而並泣既而淒雨初微慘雲猶漬悴  
色交頤媚光染臂倦臉減紅慙眉罷翠念有遷延日無  
餘晷殘陽一樹斷煙半山咽聲何處山深月寒蛩割懽  
而響微鴈分悲而音墜木念美而黃癡草憐人而碧瘁  
盼素月兮長暉鬱青霞兮奇意欲寄愁兮天高將理憂

兮地圯悲乎哉卿懷落我心卿淚沾吾手宛泣玉兮留  
膺惜怨香兮辭袖之子有念何人蔑懷高丘非夢勾金  
有臺儻丹心之不變睇青鳥之頻來

離夢賦

宋梅堯臣

抱戚戚以長處兮弔惻惻以自眎魂離離以駿邁兮精  
蒙蒙而就翳氣貿亂以軫輻兮形爽洵而荒瘁信民生  
之多難兮伊天命之方摯知閔性之無續兮畏恭經而  
遺義日月騰以漂忽兮春與秋其狎至卒撫心以抑志

分諒投艱以遺大冒帝克之餘烈兮歷三正而相仍下  
天漢而逾熾兮啟東藩於大彭胡亂夏以泯替兮賢辟  
世而迅征遡江介以幽處兮汜三徙而弗聲求王明而  
受福兮祖來儀於太平支羣龍以登績兮勅體命於遠  
夷兆別子於都邑兮更名數於京師繇清白以象賢兮  
爰頽慶而歷茲馭長策以適駿兮周窮荒而不疑敵輸  
歡以馴教兮熒爰服而來娛中心實使生外兮謹大道  
之難推惟保性之蟬聯兮上參差以千歲裕後葉之孔



艱兮憚情申而事廢志激揚之未究兮不克荷而為罪  
誨丁寧之在耳兮洵僂俛而違殆忽馳思於昊天兮又  
寤僻而自懟發與齡以交永兮且命請而罔害諒不肖  
而遭愍兮曾夫人之髣髴原本始而罔豫兮心洛陽以  
崩潰覲履厚而戴高兮顧生久其誰賴願去人間以超  
舉兮復供養以弭憂苟一覩於顏色兮豈餘生之足留  
中恍惚而自失兮恭聞命乎前修天不可以忌兮道不  
可與謀毋苟襲匹婦以圖諒兮固將徇騫父以寡尤

九愁賦

魏  
曹植

嗟離思之難忘心慘毒而含哀踐南畿之末境越引領  
之徘徊眷浮雲以太息顧攀登而無階匪徇榮而愉樂  
信舊都之可懷恨時王之謬聽受奸枉之虛辭揚天威  
以臨下忽放臣而不疑登高陵而返顧心懷愁而荒悴  
念先寵之既隆哀後施之不遂雖危亡之不豫亮無遠  
君之心刈桂蘭而秣馬舍余車於西林願接翼於歸鴻  
嗟高飛而莫攀因流景以寄言響一絕而不還傷時俗

之趨險獨悵望而長愁感龍鱗而匿跡如吾身之不留  
竄江介之曠野獨渺渺而汎舟思孤客之可悲愍予身  
之翩翔豈天監之孔明將時運之無常謂內思而自策  
算乃昔之愆殃以忠言而見黜信無負於時王俗參差  
而不齊豈毀譽之可同競昏瞽以營私害予身之奉公  
共朋黨而妒賢俾予濟乎長江嗟大化之移易悲性命  
之悠遭愁慊慊而繼懷怛慘慘而情挽曠年載而不回  
長去君兮悠遠御飛龍之蜿蜒揚翠霓之華旌絕紫霄

而高驚飄弭節於天庭披輕雲而下觀覽九土之殊形  
顧南郢之邦壤咸蕪穢而倚傾驂盤桓而思服仰御驥  
而悲鳴紆予袂而長涕僕夫感以失聲履先王之正路  
豈淫徑之可遵知犯君之招咎恥干媚而求親顧旋復  
之無軌長自棄於遐濱與麋鹿之為羣宿林藪之歲蓊  
野蕭條而極望曠千里而無人民生期於必死何自苦  
以終身寧作清水之沉泥不為濁路之飛塵踐蹊隧之  
危阻登岑堯之高岑見失羣之離獸覩偏棲之孤禽懷

憤激以切痛苦回忍之在心愁戚戚其無為遊綠林而  
逍遙臨白水以悲嘯猿驚聽而失條亮無怨而棄逐乃  
余行之所招

叙愁賦

有序

魏  
曹  
植

時家二女弟故漢皇帝聘以為貴人家母見二弟愁思  
故令予作賦曰

嗟妾身之微薄信未達乎義方遭母氏之聖善奉恩化  
之彌長迄盛年而始立修女職於衣裳承師保之明訓

誦六列之篇章觀圖像之遺形竊庶幾乎英皇委微軀  
於帝室充末列於椒房荷印紱之令服非陋才之所望  
對牀帳而太息慕二親以增傷揚羅袖而掩涕起出戶  
而彷徨顧堂宇之舊處悲一別之異鄉

序愁賦

梁簡文帝

情無所治志無所求不懷傷而忽恨無驚猜而自愁玩  
飛花之入戶看斜暉之度寮雖復玉觴浮椀趙瑟含嬌  
未足以祛斯耿耿息此長謠

愁賦

唐符載

愁之為物也親賤貧傲富貴無賢智兮不肖事違衷而必至非玄黃之色殊甘辛之味其去也若緣雲之難其來也類走丸之易愁兮愁志士蹇以徘徊鬱風雲之氣挺棟梁之材思宏廓以經濟刻洪勳於鼎鼎命路猶隘天衢未開滄波悠悠以東注白日忽忽其西頽玄德拊髀以泣下孔明抱膝而思來愁兮愁靜女悵其誰語聳端操而不爽抱明心以自處當泮冰之良辰期鳴鴈之

得侶桃李豔於淑景蕙蘭生於幽渚望蹇修兮不來念  
良人兮何許愁兮愁邊塞兮行役始忘家而徇國忽時  
淹而歲積金河流而更遙銅柱去而太劇凝雲披嶺驚  
沙滿磧馬向北以嘶風人上隴而吹笛功名慨其緬邈  
鬢髮颯以斑白伏波據鞍而骨驚定遠操戈而涕激愁  
兮愁禁掖兮恩光爭修曼態競飾明璫動千金之巧笑  
希一顧於君王嬌妒盈於思慮移奪起於毫芒何長門  
之咫尺邈阻絕乎陵岡宮殿深兮月皎歌吹清兮夜長



班姬無言以掩扇陳后迴裾而就牀愁兮愁春與秋兮  
登臨放臣寓目遊子開襟楓江千里青壁萬尋微波蕩  
漾灌木蕭森香雜花而覆水見槁葉之亂林起宋玉之  
沉思傷屈平之遠心愁兮愁往事紛其斷續申生被譖  
周勃受辱樂毅無階以轉燕黃權何計而歸蜀投令君  
於虛器疑卞和之美玉李廣失路於匈奴徐市泛舟於  
海曲過山陽而日晚望西陵而樹綠包胥感激於秦庭  
鄒陽畏逼於梁獄愁兮愁羈志杳而無伴鴻漸於陸層

霄未半懷戴君與利物每行吟而坐歎安得百斛之醇  
醪使斯愁也霞開而霧散者哉

愁賦

明 王世貞

搖落窮愁云胡在心  
棼如蠶絲歷亂難禁  
又似膠漆黏結不分  
沈冥晝晦鬱術寒雲  
七情之表五蘊之外  
別構愁國金湯衣帶  
海輸何竭酒攻不解  
於是僕產樂土晚繫  
愁庭出入愁伍寢食  
愁并朱顏向墨鬢鬢  
移素中腸陰窄駢脅  
徐露鄰死尺寸厭生  
萬端撫膺搏頰聊舉  
其

凡在昔齊相初羈燕儲未釋狐腋已空烏頭尚黑賄幸  
姬兮不顧望故鄉兮長隔難迫明而咿喔馬中夜而繭  
粟嶠關垂啟追兵已迫若乃荆卿既遣吕王若故刃隔  
提囊尸分踞柱秦兵電發檄書星布君父怨謫國人指  
詈遼左奚匿易流堪揭撫頭顱而非我知社稷之他氏  
至如蘇季獻策三年不收然柱欲燼因鬼虛謀貂離披  
而別體馬跼蹐而異投鳴機轉軋戛釜誰留榮將貴逝  
辱與賤求爰有中廢長門追寵增成君恩一失六宮見

輕玉階絕跡銀井無聲明月含波春花欲霰宮車徑度  
簫韶別殿空乞賦於黃金但沈吟於紈扇又乃棄婁斤  
女緘思竇公爰爰白兔超超草蟲鴛鴦瓦圻玳瑁牀空  
滔戔不歸嘉書未返鐵嶺天遙榆闕夢轉覩三星以何  
夕歎流年之漸晚其或中朝鳳女遠嫁烏孫酪漿盛腥  
毳褐奇溫穹廬代宇服匿承罇髻懸赭面啁啾獸言盼  
嵯峨之金屋隔縹緲之玉門雖託情於黃鵠竟絕軌於  
南轅載有王稽內誅安平外畔應侯奉朝明主興歎一

士諤諤沈幾先見欲辭不可覺禍難遠嗟富貴之履危  
仍寄願於貧賤未若屈子懸腸郢都削跡漢溪詹尹謝  
筭漁父鼓枻隱宗國之猶綏慨讒夫之為蠱樂猗桑之  
無知覩耿雉而尚寐抱石匪遠回光難覲及夫晉祚中  
衰司空被羈盧郎感交破涕為詩如何撫枕遂異聞雞  
倚危譙而清嘯揆扶風之妙辭雙輶駭駟華蓋摧坻百  
鍊繞指七尺難期於戲梁獄重關夏臺累榭四候辭春  
兩儀偏夜雀鼠同貪荆棘互藉貝錦滔天金雞香赦功

成不賞冤極何論感飛霜於六月遲返照於九闌身將  
奮而俄掣聲欲舉而潛吞懼於垣之屬耳獨黯然以銷  
魂亂曰秋風至今愁以來秋風逝兮愁不歸愁帶長兮  
無可減愁淚枯兮不沾衣萬古愁兮一身歛祇應人世  
有愁稀

坐愁賦

有序

宋晁補之

魯人閻子仲武行年七十四躬耕於鄙歲旱不入而色  
藜藿促鼓其琴作坐愁之聲嘗所與遊晁子補之恐其

傷也為作坐愁賦假翁與過者語以解之其辭曰

彼何人而處廓兮匪三閭而獨醒鬢毛毯其雪糝兮眸  
子瞭其星明塊獨守此中野兮困無禾而饔清拂素琴  
之浮埃理坐愁之遺聲忽推几而睨天送飛鴻之杳冥  
或過其前曰有心哉然何求昔林類之行歌云既老而  
無憂翁年運而德加翁何為乎坐愁翁偶顧而若聞猶  
援琴而不舍曰子非魯之儒服者邪何以不知漆室女  
者晝輟紆而淫思宵倚楹而悲咤彼淺哉其量人匪魯

憂而欲嫁豈不誤邪吾亦傷夫魯之君子昔在厄而不  
摻賜自殖而何誅顧乘軒而中紺羌同道而恥茲乃長  
飢乎回憲彼林類其何人雖信賢而獨善或者曰未既  
也請言翁之近者昔蘇門之遊民絀枯桐之一絃匪無  
絃之寂默異五絃之啾誼對阮子惟長嘯為稽生纔一  
言人欲怒之戲排諸淵勃宰而出則又粲然彼何知夫  
坐愁幾蹢躅乎樂天矣然聖人猶以謂樂天有憂之大  
者也况憂人之憂豈有既哉於是翁泛然可油然謝曰



憂樂外矣吾當虛之

四愁賦

明黃淮

冲虛子索居屏跡息慮省躬因洞觀夫玄化爰有感於  
深衷年與時馳羌景物之不異情隨事變何欣戚之靡  
同若乃陽和煦育品彙昭融穠李芳桃耀繁華於朝日  
金鞍繡轂醉羅綺於春風轉歌喉之窈窕霑香霧之空  
濛踟躕關難斯遊未已爭妍索笑其樂何窮我則低摧  
喪氣憂悶填胸虛負歲華之遷易那知花信之始終聽

簷外鳴禽空教夢斷見牆頭飛絮始覺春濃慨窮途之  
寂寂奈幽思之忡忡至若蘭雨傳香鷗波漲綠開池館  
以來南薰折荷簫以泛醺醺和白紵之新詞歌采蓮之  
麗曲或鳴琴以俯清流或岸幘而倚修竹扇影風泛兮  
齊紈簟紋涼透兮湘玉我則衆穢流腥炎蒸蘊毒飛蟲  
旋繞遣拂何暇於言談流汗沾濡起居不離乎裋褐紛  
然塵垢之侵肌最爾煙靈之迷目焉敢恣其趨踰豈能  
頻於盥沐及夫序屬三秋金風扇冷時維殘臘素雪揚

威盼鄉信之沉迷目窮鴈字苦凝寒之慘慄體怯鴉衣  
漏沉沉兮長夜魂渺渺兮親聞警鐸傳聲兮駭膽而慄  
魄殘燈照影兮洒淚而長吁於斯時也爾乃闔勝誇奇  
攜朋拉友浥九霄之沆瀣待月南樓玩六出之奇葩張  
筵北牖列侍女擁歌姬薦嘉肴稱壽酒婉兮媚物之情  
哆兮懸河之口第恐為樂未央而盛時年貌之不留又  
豈知窮愁迫蹙而羈人歲月之易久也嗟夫余嘗究夫  
庶物之理萬化之原是非互見得失相沿競侈靡縱遊

觀則流之於放閔阮窮極愁苦復溺之於偏況消長盈  
虛實玄機之旋斡而窮通壽夭豈人事之能遷是故陋  
巷簞瓢回也不改其樂易簣待盡參乎獨得其傳又若  
陸績顛危而不忘乎孝行史遷殘毀而猶校夫陳編韓  
退之貶潮陽而侃然正大之氣上干霄漢杜子美走川  
峽而懇乎忠愛之情屢見詩篇此皆騰輝於汗簡非徒  
誇大於浮言復有至人道備德全不與時化不為物牽  
脂悲喜於一致安性命之自然匪棘匪徐留心澹泊之

域爰清爰靜游神冲漠之天斯其盛矣我願學焉

江上愁心賦贈趙侍郎

唐張說

江上之峻山兮鬱崎峨而不極雲為峰兮煙為色歛變  
態兮心不識江上之深林兮杳冥濛而不已鶯為花兮  
猿為子紛盪漭兮情莫擬夏雲峻兮若山秋水平兮若  
天冬水漸兮淅淅春草靡兮芊芊感四時之默運知萬  
化之潛遷伴衆鳥兮寒渚望孤帆兮日邊雖欲貫愁腸  
於巧筆紡離恨於哀絃是心也非模放之所逮將有言

兮是然將無言兮是然

謝燕公江上愁心賦

唐趙冬曦

江上之仙鶴兮鳳翥而龍躍氣摩青天兮遙橫碧落集  
洞庭兮乍駐倏迴翔兮寥廓江上之鳴鴈兮違陰以就  
陽中霄翻翰兮上帶青霜雖主人兮感會蹇淹留兮瀟  
湘湘水兮深深荆山兮岑岑荆有玉兮玉為音湘有芷  
兮芷為心我所思兮惓惓不得見兮霑襟搦芳札兮援  
寶瑟申短章兮吐長吟草萋萋兮自綠目征帆兮春水

曲水一望兮空踟躕望眇眇兮思緜緜憶都門兮夏雲  
邊邈千里兮無由緣送涼風兮脫葉復窮陰兮冒天緬  
一日其如歲矧四運之相遷離別也騷愁焉惡乎然惡  
乎不然

江上愁心賦

宋李綱

我歸自南兮涉千里之長江蘭舟桂檝兮泛煙水之湯  
湯波平風軟兮若枕席之徜徉忽長飈之暴作兮巨浪  
駭以騰驤聲殷殷以雷動兮濤渺渺以雲翔天地駭以

迴薄兮峰巒岌以低昂舟人惴慄而不敢進兮依浦溆  
而深藏紛雨雪之交集兮知極陰之變陽俄雲霧之潔  
清兮升杲日於東方望列岫之參差兮辨遠樹之微茫  
橫中流而弔古今此江以為阻不修德而恃險兮咸奔  
亡而係虜彼六朝之三百年兮竟江山之誰主歷隋唐  
而混一兮迄五季而割據惟真人之龍翔兮削僭亂而  
奠區宇漠然但見山高而水清兮垂二百年不復識旗  
幟而聞金鼓巨盜乘間以竊發兮意欲窺東南而負固



煩王師之出征兮戈甲照於江渚舉泰山以壓卵兮何  
孤雛與腐鼠顧生靈之不幸兮一時困於豺虎吾家亦  
避寇而遠適兮旅泊於異土念親年之已高兮嗟幼稚  
之誰撫幸歸程之不遠兮悵風濤之齟齬方弔往而傷  
今兮獨抑鬱其誰語惟江上之愁心兮結長怨於萬古

御定歷代賦彙外集卷十七

欽定四庫全書薈要卷一萬七千三百七十七

集部

御定歷代賦彙外集卷十八

情感

望賦

唐 劉禹錫

邈不語兮臨風境自外兮感從中明晦轉續兮八極鴻  
蒙上下交氣兮羣生異容發孤照於寸眸驚遐情乎太  
空物乘化兮多象人遇時兮不同嗟乎有目者必騁望  
以盡意當望者必緣情而感時有待者瞿瞿忘懷者熙

熙慮深者瞠然若喪樂極者冲然無違外徙倚其如一  
中糾紛兮若斯望如何其望最樂晞慶霄兮邈阿閣如  
雲兮天顏咫尺如草兮臣心踴躍扇交翟兮歲蕤旗升  
龍兮蠖略日轉黃道天開碧落凝瑞景於庭樹掬非煙  
於殿幕望如何其望最歡登灞岸兮見長安紛擾擾兮  
紅塵合鬱葱葱兮佳氣盤池象漢兮昭回城依斗兮闌  
干避御史之驄馬逐倖臣之金丸望如何其望攸好宗  
萬靈兮越四隩漢帝仙臺兮秦皇海嶠霓裳踊於河上

馬跡窮乎越徼紫氣度關而斐亶神光燭天而照耀  
春春以馳精聳專專而觀妙望如何其望有形視蠢蠢  
兮窮冥冥楚塞氛惡兮蕭闌燧明暈籠孤月兮角奮長  
庚沙長似雪磧有疑城煙雲非女子之氣草木盡王者  
之兵審曳柴之虛警破來騎之先聲信有得於風鳥亦  
無言於旆旌望如何其望且慕恩意隔今年光度雕輦  
已辭兮金屋何處長信草生兮長門日暮候翠華之僮  
來仰玄天以自訴况復湘水無還漳河空注淚染枝葉

香餘紈素風蕭蕭兮北渚波煙漠漠兮西陵樹夫不歸

兮江上石子可見兮秦原墓拊琴翻朔塞之思挾瑟指

邯鄲之路望如何其望最傷俟環玦兮思帝鄉龍門不

見兮雲霧蒼蒼喬木何許兮山高水長春之氣兮悅萬

族獨含嘔兮千里目秋之景兮懸清光偏結憤兮九迴

腸羨環拱於白榆惜馳暉於落棠諒衝斗兮誰見伊戴

盆兮何望豈止蘇武在胡管寧浮海送飛鴻之滅沒附

陰火之光彩鶴頸長引烏頭未改恨已極兮平原空起

何時兮東山在永望如何傷懷孔多降將有依風之感  
宮人成憶月之歌歌曰張衡側身愁思久王粲登樓日  
迴首不作渭濱垂釣臣羞隨洛陽拜塵友

歸魂賦有序

梁沈炯

古語稱遊魂升極周易有歸魂卦屈原著招魂篇故知  
魂之可歸其日已久余自長安反乃作歸魂賦辭曰  
伊吾人之陋宗資元聖而云始肇邵閎之靈源分昌發  
之世祀實聞之乎家記又享之於博史亢宗貴而博古

四史成乎一身怪日月之遼遠而承襲之相因豈少賤之能察非末學之知津也若夫風流退讓在秦作相越江以東惟戎及鄴出忠出孝且卿且公世歷十五爰逮余躬值天地之幅裂遭日月之零虹去父母之邦國埋形影於胡戎絕君臣而辭骨肉躋厚地而跼蒼穹抱北嘶之胡馬望南飛之夕鴻泣霑襟而雜露悲微吟而帶風昔休明之云始余播棄於天地自太學而遊承明出書生而從下吏身豫封禪之官名入南宮之記登玉墀



之深渺出金門之崇邃受北狄之奉書禮東夷之獻使

原本闕一字實不嘗至屈膝遜言以殊方降意嗟五十之踰

年忽流離於凶忒值中軍之失權而大盜之移國何赤  
沴之四起豈黃霧之云塞祈瘦弟於赤眉乞老親於劇  
賊免伏鑕以解衣遂窘身而就勒既而天道禍淫否終  
斯泰靈聖奮發風雲響會掃欃槍之星斬蚩尤之旆余  
攀逆而効從遂妻誅而子害雖分珪而胙土迄長河之  
如帶肌膚之痛何泯潛翳之悲無狀我國家之沸騰我

天下之匡復我何辜於上玄我何負於鄰睦背盟書而  
我欺圖信神而我戮彼孟冬之云季總官司而就絀託  
馬首之西暮隨檻車而迴轍履戕戕之層冰面颼颼之  
巖雪去莫敖之所縊過臨江之軌折矧今古之悲涼並  
攢心而霑袂渡狹石之欹危跨清津之幽咽鳥虛弓而  
自隕猿號子而腹裂厯沔漢之逶迤及楚郡之參差望  
隆中之大宅映峴首之沈碑既縲然而就鞅非造次之  
能窺至若高祖武皇帝之基天下也岐周景亳之地窺

圖雀書之祕醒醉之歌味絕讓畔之田鱗次余既長於  
克民覺何從而掩泗水兮深且清宛水兮澄復明昔  
南陽之穰縣今百雉之都城我太宗之威武遏宛洧而  
陳兵百萬之虜俄成魚鼈千仞之阜倏似滄瀛雖德刑  
成於赦服故蠻狄震乎雄名乃尋浙而歷商遂經秦而  
至洛覺高蹈之清遠具風雲之倏燦其山也則嶽岑巖  
鬼巖婁婆陀或孤峰而秀聚或逸出而橫羅千歲之木  
半嶺表百丈之石枕溪阿其水則砰訇潏汨或寬或疾

擊萬瀨而相奔聚千流而同出何武關之狹隘而漢祖  
之英雄山萬里而仰雲霧水百仞而瀉蜿蜒若一夫之  
守隘豈萬衆之能攻去青泥而踰白鹿越渥水而到青  
門長卿之賦可想邵平之跡不存咄嗟驪山之阜惆悵  
灞陵之園文恭儉而無隙羸發掘其何言訪軹道之長  
組舍藍田之瑱璠無故老之可訊並撫撫之空原登未  
央之北闕望長樂之基趾伊太后之所居築旗亭而成  
市槐路鬱以三條方塗坦而九軌觀阡陌之遺踪實不

乖乎前史傍直城而北轉臨橫門而左趨南則董卓之  
鄔北則苻堅所居即二賊之墟壘為彼主之庭除終南  
寵從太一嵯峨九嵎崛起八壘連河汨涇泥之混濁灌  
渭渚之清波指咸陽而長望何趙李而經過息甘泉而  
避暑猶爽塏而清和爾乃背長夏涉素秋卧寒野坐林  
隙霜微凝而侵骨樹裁動而風道思我親戚之顏貌寄  
夢寐而魂求察故鄉之安否但望斗而觀牛稚子天於  
鄭谷勉勵媿乎延州聞愛妾之長叫引寒風而入楸何

精靈之堪此乃縱酒以陶憂至誠可以感鬼秉信可以  
祈天何精隕而魄散忽魂歸而氣旋解龍驂而見送走  
郵驛於亭傳出向來之大道反初入之山川受繞朝之  
贈策報李陵之別篇淚未悲而自墮語有咽而無宣於  
時和風四起具物初榮草極野而舒翠花分叢而落英  
魚則潛波渙濯鳥則應嶺俱鳴隨六合之開朗與風雲  
而自輕其所涉也州則二雍三荆昌歡江并唐安涪洛  
巴郾雲平其水則淮江漢洧隨浩汗灋潦澹潏河涇渭

相亂或浮深而揭淺或淩波而沿岸每日夕而靡依常  
一步而三歎蠻蜚之與荆吳元狄之與羌胡言語之所  
不通嗜欲之所不同莫不疊足歛手低眉曲躬豈論生  
平與意氣止望首丘於南風悲城邑之毀撤憇風水之  
渺揚既畫地而謁帝乃懷橘而升堂何神仙之足學此  
即雲衣而虹裳也

不寐賦

宋 劉攽

怵鬱邑其馮中兮何鑒寐其弗夷方永夜之未艾兮廓

靜處而長思悼既往之弗及兮慨來今之曷知緒將絕  
而復續兮精發越而淫移脩四海其再撫兮泯萬朞乎  
須臾武勝商而歸周兮天保定其千億叔旦兼乎三王  
兮仰勤思而有獲孔潛精於好學兮致憤懣於無益樂  
好善而用魯兮孟見喜乎顏色仁弗遇於衛頃兮願奮  
飛而不得翟相氣而見祥兮獻肇謀乎虞虢彼遠慮之  
與近思兮智與愚皆從其職嗟民生之多艱兮嗟以心  
為形役君子有不安其命兮小民有不度其力非蠢蠢



之潛膚兮曾內懷夫大棘惟昔夢之遽遽兮既悵然而  
獨寐亮伐柯之不遠兮何內韞而笨固晞聖人之大覺  
兮繇萬世而不遇幸曲肱而自怡兮庶無迷於初度

夢賦有序

漢王延壽

臣弱冠嘗夜寢見鬼物與臣戰臣遂得東方朔與臣作  
罵鬼之書臣遂作賦一篇叙夢後人夢者讀誦數數有  
驗臣不敢蔽其辭曰

余宵夜寢息忽則有非常之夢其為夢也悉覩鬼物之

變怪則有蛇頭而四角魚首而鳥身或三足而六眼或  
龍形而似人羣行而奮搖忽來到吾前伸臂而舞手意  
欲相引牽於是夢中聲怒腦臆紛紜吾含天地之淳和  
何妖孽之敢臻爾乃揮手振拳雷發電舒斲游光斬猛  
豬批蠻殺斫魑魍捎魍魎拂諸渠撞從目打三顱撲茗  
莧扶夔魍搏睨眈蹴睢盱剖列屢掣羯孽劓尖鼻踏赤  
舌拏僇毳揮髯鬚於是手足俱中捷獵摧拉澎湃跌抗  
措倒批咎彊梁捶捋劇拔僚余搥撻點拖頽瞶抨撻軋

於是羣衆聚魅駭擾遑遽煥衍叛散乍留乍去變形瞪  
眄顧望猶豫吾今於是更奮奇譎捧攫噴扼晃晃撻拉  
吶嚶批擾於是三三四四相隨跟踉而歷僻礧礧磕  
精氣充布輶輶膠膠鬼驚魅怖或盤跚而欲走或拘攣  
而不能步或中瘡而宛轉或捧痛而號呼奄霧消而光  
散寂不知其何故嗟妖衰之怪物敢干真人之正度耳  
唧嘈而外朗忽屈信而覺悟於是難知天曙而奮羽忽  
嘈然而自鳴鬼聞之以迸走心惴怖而皆驚亂曰齊桓

夢物而以霸兮武丁夜感得賢佐兮周夢九齡年百慶  
兮晉文監腦國以競兮老子役鬼以神將兮轉禍為福  
永無恙兮

夢賦

唐杜 頤

夫人者何乾坤之至精夫夢者何精爽之所成及乎羣  
動息閑宇清澹爾安寢儼乎無營亦或不意而得亦或  
因感而生明休咎之先兆通喜怒之深情其為吉也懸  
三刀以作郡凌八門而上征或生松以表秩或贈蘭以

為名監腦審其戰勝鑿心啟其才英其為凶也晉侯彌  
留作疾於二豎孔公將歿觀奠於兩楹雖否臧之殊感  
諒希微之難明是以太古無夢以絕欲聖人肇夢以治  
想隨事而生觸類而長或含悲以憎暢或當歡而契賞  
曾有慕而忽來屬所思而必往雖遼萬里遽諧疇昔之  
遊縱冥九泉亦覩平生之像鬼出神入惟惚惟恍則有  
睽間庭聞煙霜歲暮常馳戀於定省忽飛魂於寐寤撩  
軒幌而無隔邈山河之徑度常倏忽而往來竟不由於

道路獨有遭遇明時羈遊上國才譽不振命途仍塞仰  
軒后之通感慕殷宗而見刻當捧日而披誠庶明君之  
夢得

夢捧日賦

以神遇輝燭兆  
發嘉祥為韻

唐蔣防

靈降嘉夢天垂至陽誠發身之兆朕符翊聖之禎祥所  
謂神而遇闇而章息冲澹之居于于而自得見貞明之  
質曖曖而彌光倏爾疑升瞰兮下燭瞳瞳甘寢之所悅  
惚曾泉之曲撫金烏之翼匪隔雲霄駐羲和之車乍迴

昏旭想夫卑高莫鄰授受何因忽煌煌而委照值默默而凝神寂其神乃無間而通碧落上其手自有昊而得紅輪縹緲魂交光芒景附肘腋輝燦襟懷煦嫗類銜規於遠山同抱壁於中路在忘形之際用示無私當向晦之時將祛未寤豈不以精誠可託光陰可駐從九霄之降祉表千載之嘉遇者也故曰道契幽微天且不違肝蠻陰隲指掌陽輝載營魄而虛無默住荷靈貺而照燭潛依至若冥蒙上越埃壘中歇始悠悠以神契俄赫赫

而明發驗扶桑之際其往阻修偶支枕之時其來倏忽  
是知天無親降靈而非遐神不昧獨幽而不賒不然何  
虛徐衽席承奉光華高眠而不驚不悚見瑞而可仰可  
嘉然則荀令之談足徵程昱之榮有非常眷眷於天路  
每拳拳於雲表周旋寤寐偃仰昏曉庶照臨之理感通  
知葵藿之誠不小

莊周夢為蝴蝶賦

以昔者莊周夢  
為胡蝶為顯

唐  
賈餗

窮萬化之指歸得七篇於往昔何真人之形氣以異類



而遷易將以明道之樞喻心之適徐徐在寐忽羽化於  
他方相相既遊忘魂交於此夕是知溥天之下萬物一  
也雖飛走之或殊何生成之為假形隨夢改豈必大人  
占之心與物遷孰云夫子聖者澹然休息悅爾飛揚閭  
出蠨蛸之戶潛辭蟋蟀之堂風景熙熙但娛情於胡蝶  
是非草草已委蛻於蒙莊既而忽忽悠悠東西泛浮動  
皆造適止必忘憂草上翩翩與百花而共媚林間搖曳  
似一葉之先秋彼賢愚波注禍福環周信乃人間之累

非同域外之遊且夫浩浩陰陽茫茫羣衆紛習襟之憂  
患勞日夜而迎送是以至人因茲託諷為魚而江湖可  
入為鳥而風雲可控飄然而往安知棄我如遺倏爾復  
來又疑與爾俱夢故得弔詭之理明懸解之規方形神  
之寂寞有變化之云為夢也者不期而會飛也者以息  
相吹豈銜髮之能診蓋忘蹄之可知至于往復須臾以  
化為徒寤與覺而未辨蝶將周而已殊是以大同而言  
萬物為肝為膽小異而說一身為越為胡苟愚智而自

得實聖靈之軌模客有志業未如居多不愜六夢紛其  
夜動七情忘於晝接乃陳古以況今賦莊周之夢蝶

莊周夢胡蝶賦

以題為韻

唐張隨

伊漆園之傲吏談玄默以和光表人生之自得繫萬化  
之可量萬靈齊乎一指異術昭乎通莊忘言息躬輒造  
逍遙之境靜寐成夢旋臻固象之鄉於以遷神於以化  
蝶樂彼形之蠢類忘我目之交睫於是飄粉羽揚翠鬣  
始飛飛而稍遲俄相相而自愜煙中蕩漾媚春景之殘

花林際徘徊舞秋風之一葉於戲變化悠悠人生若浮  
希微兮其狀方異恍惚兮其神遂收雖蘧蘧而復體尚  
悄悄以在眸我豈彼類彼寧我儔苟夢非而覺是誠虛  
往而實留且玄蹤莫覲真理難求莊周之夢蝶而胡蝶  
之夢周歟迺知元氣混然感通斯衆為生死之異分量  
寤寐而適中形因靜息符大辨之不言神以化遷異至  
人之無夢若夫氣為質本夢與道俱以我之有化彼之  
無固假寐而倏忽越百齡以須臾其在周也不知蝶之

於彼矣其在蝶也不知周之於此乎若然者萬物各得其性一體或殊其途有徐徐而龜曳其尾有察察而狼跋其胡智者所以自智愚者所以自愚則孰能間其巨細孰能別其榮枯欲窮莊生夢蝶之理走將一問於洪鑪

夢舞鍾馗賦

以德至前王始觀神跡為韻

唐周繇

皇躬抱疾佳夢通神見番綽兮上言丹陛引鍾馗兮來舞華茵寢酣方悅於宸扆不知為異覺後全銷於美疾

始訝非真開元中撫念齊民憂勤大國萬機親決於宸  
斷微瘡遂沾於聖德金丹術士殊乖九轉之功桐籙醫  
師又寡十全之力爰感神物來康哲王於時漏滴長樂  
鐘敲建章局禁闔兮閑羽衛虛寢殿兮闕嬪嬙虎珀枕  
欹象榻透熒熒之影鰕鬚簾捲魚燈搖閃閃之光聖魂  
惝恍以方寐怪狀朦朧而遽至砵斲標衆顛類特異奮  
長髯於闊臆斜領全開搔短髮於圓顙危冠欲墜顧視  
纔定趨蹌忽前不待乎調鳳管撥鸞絃曳藍衫而颯纚

揮竹簡以踰蹀頓趾而虎跳幽谷昂頭而龍躍深淵或  
呀口而揚音或蹲身而節拍震雕栱以將落躍瑤階而  
欲折萬靈沮氣以懾惶一鬼傍隨而奮蹻煙雲忽起難  
留舞罷之姿雨電交馳旋失去來之跡容想纔悟清宵  
已闌祛沉疴而頓愈痒御體以猶寒對真妃言寤寐之  
祥六宮皆賀詔道子寫娑娑之狀百辟咸觀彼號伊祁  
亦名鬱壘儼祆於凝沍之末驅厲於發生之始豈如呈  
妙舞兮薦夢明君康寧兮福履

夢歸賦

唐柳宗元

罹擯斥以窘束兮余惟夢之為歸精氣注以凝沍兮循  
舊鄉而顧懷夕余寐於荒陬兮心慄慄而莫違質舒解  
以自恣兮息惛翳而愈微歛騰湧而上浮兮俄滉漭之  
無依圓方混而不形兮顥醇白之霏霏上茫茫而無星  
辰兮下不見夫水陸若有鉢余以往路兮馭儼儼以回  
復浮雲縱以直度兮去濟余乎西北風纚纚以經耳兮  
類行舟迅而不息洞然於以瀟漫兮虹蜺羅列而傾側



橫衝颺以盪擊兮忽中斷而迷惑靈幽漠以滯汨兮進  
怵悵而不得白日邈其中出兮陰霾披離以泮釋施嶽  
瀆以定位兮互參差之白黑忽崩騫上下兮聊按行而  
自抑指故都以委墜兮瞰鄉閭之修直原田蕪穢兮崢  
嶸榛棘喬木摧解兮垣廬不飾山嵒嵒以崑立兮水汨  
汨以漂激魂恍惘若有亡兮涕汪浪以隕軾類曛黃之  
黯漠兮欲周流而無所極紛若喜而怡儼兮心回互以  
壅塞鐘鼓隍以戒旦兮陶去幽而開寤矚尉蒙其復體

兮孰云桎梏之不固精神之不可再兮余無蹈夫歸路  
偉仲尼之聖德兮謂九夷之可居惟道大而無所入兮  
猶流游乎曠野老聃遁而適我兮指淳茫以縱步蒙莊  
之恢怪兮寓大鵬之遠去苟遠適之若茲兮胡為故國  
之為慕首丘之仁類兮斯君子之所譽鳥獸之鳴號兮  
有動心而曲顧膠余衷之莫能舍兮雖判折而不悟列  
茲夢以三復兮極明昏而告愬

夢覲賦

宋  
晁補之

歲闕逢之渚灘兮前日至而匪思夢啾耳之薨薨兮蒼  
青蠅其扛楮咸南徙而未逝兮遺其矢如散絲余俛避  
而不汙兮一媼背之淋漓膈不知其可穢兮偶並趨於  
西帷媼左目之穴枯兮萍四五其萃之旁兩媼之無言  
兮亦依帷而靡期朝怛寤而自診兮營營發詩而可知  
蹇俱翔而遺矢兮技止此其奚為惟一盲而兩默兮與  
目萍為何穢豈眇視不足與明兮萍非寄而終離羌何  
為而朕此兮神無心而罔私拜受神祥兮編之冊詞文

女三之為姦兮比匪人而惡之微夫周公之為見兮迂  
若此其余哀欲徼福其安敢兮問故老其增疑苟不汙  
為已免兮謝三媼之難知

述夢賦

宋 歐陽修

夫君去我而何之乎時節逝兮如波昔共處兮堂上忽  
獨棄兮山阿嗚呼人羨久生生不可久死其奈何死不  
可復惟可以哭病余喉使不得哭兮况欲施乎其他憤  
既不得與聲而俱發兮獨飲恨而悲歌歌不成兮斷絕

淚疾下兮滂沱行求兮不可過坐思兮不知處可見惟  
夢兮奈寐少而寤多或十寐而一見兮又若有而若無  
乍若去而若來忽若親而若疎杳兮倏兮猶勝於不見  
兮願此命之須臾尺蠖憐余兮為之不動飛蠅閔余兮  
為之無聲冀駐君兮可訴恍余夢之先驚夢一斷兮魂  
立斷空堂耿耿兮華燈世之言曰死者漸也今之來兮  
是也非也又曰覺之所得者為實夢之所得者為想苟  
一慰乎余心又何較乎真妄綠髮兮思君而白豐肌兮

以君而瘠君之意兮不可忘何憔悴而云惜願日之疾  
兮願月之遲夜長於晝兮無有四時雖音容之遠矣於  
恍惚以求之

述夢賦

明 胡儼

登高樓之崔嵬兮軼氛埃於層霄天宇廓其洞虛兮際  
空明於沈寥綺牕朱綴紛玲瓏兮風肅肅而下飄覩真  
人於玉臺兮乘彩鳳而逍遙披太虛而進謁兮蹙然閔  
余之瘠磽啟靈文而欲授兮顧塵昏之未銷既食余以

麟脯兮又飲之以醇醪琴高鼓以清瑟兮飛瓊汎其雲  
璈邀王喬而宿之兮吹參差於鳳匏何處子之綽約兮  
姱修睂而峨翠翹肅歛容而不敢訊兮歛凌風而高超  
余惝恍莫知所之兮王子導余以遊遨挾光景以凌厲  
兮薄星辰而上朝撫扶桑之東枝兮擘若木之高標駭  
神鼇之顛屨兮天吳出而舞潮方遊鷗之擊水兮儵鵬  
翼而扶搖振余袂於千仞兮晞余髮乎陽喬升崑崙而  
餐玉英兮渺瑤水之蕩滴金堂闕其無人兮悲蟠桃之

不實駕青蚪而高駝兮過方諸而一息珠宮貝闕嵯峨  
兮蔭玉樹而蕭瑟接飛仙之冉冉兮慨弱流之無極盧  
生去而不返兮海若誇於河伯陋夸父之不知止兮哀  
愚公之又惑召茶壘於杜索兮截雄虺之九首擲封狐  
於萬里兮顧夔魑乎何有命庚辰於淮渙兮紕支祁於  
龜山猱猱殪於青丘兮檣杪逐乎荆蠻豺虎深藏而避  
跡兮蛟螭匿蟠乎重淵檻余轡以僮徊兮飄然遊乎瑤  
之圃步春臺以夷猶兮覩鈞天之萬舞幸余逢此休嘉



兮內欣欣而和煦羌回車以復路兮順凱風而曾舉山  
竇竇而雲冥冥兮佳木秀而承宇紛紅蘭於廣術兮喜  
芳菲其襲予恍然乎歸來兮惟覺時之寂處寄遐思於  
寥廓兮玩孤芳而容與

夢遊山賦

明楊爵

時和煦以轉泰兮歲惟丁夫壬寅余髣髴於夢中兮夢  
歸游於咸秦歷韓魏之故疆兮汎柏舟於渭濱浮颶颶  
以遠覽兮暫憩夫山之危岑乃吳嶽之崔嵬而秀麗兮

古號曰西雍之鎮峰突岼以峻出兮勢若連乎霄辰石  
巉巖以峻嶒兮百壑衍其嶙峋風習習以清和兮迹迴  
脫於世塵草與木森森而天喬兮秀雲邊其萃尊鳥與  
獸蹒蹒而頡頏兮若解意以相馴余乃采芝蘭以聊茹  
兮氣和煦而苾苾挹清泉以時酌兮蕩吾夙昔之塵襟  
忽四顧以寥廓兮百峰羅翼其共臨俯仰余長嘯而朗  
吟兮高曾次以樂真山有廟焉迤邐其麓之東南兮以  
時安侑乎嶽神棟宇苞暈其壯固兮丹青煥乎其惟新

背巖嶮而面涇渭兮延廣袤其幽沉古取夫萃與渙之  
大義兮儼嶽像以獨尊予乃肅容儀以瞻拜兮心慄祇  
其快覩復長跪而祝之曰唯明神其鑒觀於下土以大  
義而降禎祥與妖孽兮斯固無幽而不燭夫何世事之  
紛紛乃有稽典訓而不類兮固予中心其眩瞽予敢筮  
游衍而不予隱兮願得夫子奪之微故惟予小子之有  
生兮何不辰而遭世風波洒憂時之血忱而貞志於寧  
先兮固久罹於窞垓時省愆而思咎兮求不忝於屋漏

於歲月之陽春兮今已雨過念予總角而志學兮每矢  
心以克邁嚴步履以出戶兮敢斯須而或怠景先哲以  
周旋而與歸兮忽凶害焉其顯崇固予小子反覆思之  
而莫知其謂也語畢悽慘流淚潸然偃僂俯伏聽神所  
言惟神賑爾而有聲兮復喟然其長歎曰嗚呼來汝小  
子兮是爾之愆爾不聞曲其躬而圓其行兮取封侯以  
相先或有貞直方而未少回兮死固不免於道邊當行  
而吾行之兮當止而即止斯先達之明訓而可敬服兮

胡不珍身而量處道固不能無消息兮應斯有常而有  
否苟相幾而或少戾兮夫孰非以災而自取惟明哲之  
見高一世兮動自遠於坎坷燭隱機而尚肥遯兮泛長  
江之一舸乃有迷檢括而未諧兮拂潛晦以自頤銜崑  
山之良璧兮人共惜夫楚和履大閑而不苟措兮固自  
謂世所尚也當柄鑿之不類而欲強置兮孰不指身心  
以為訛嗚呼小子而今後其尚疊疊焉以克勵未可以  
一廢而遽挫思福堂之玉汝於成兮方一念之偏頗惟

古良士之堅志於患難兮日尚友以切磋寧雉介之耿  
於羅網兮勿狡兔其爰爰寧松柏挺挺於歲寒兮勿桃  
李其灼灼何所往而非吾可安之地兮慎無惕中而懷  
憂彼皇矣之全賦於有生之初兮惟反身而是求聽吾  
誨爾之諄諄兮尚不忝於前修苟迷途其終不悟兮乃  
脂韋以自羞予乃再拜稽首而起應噍噍其未已將周  
旋以出戶忽驚愕以覺悟時東方之既晨媿絲粟於枕  
衾嗚呼天邪神邪教戒懇切誠可信而可遵大道坦坦

而無曲兮固不越乎吾之心

夢洲賦

明 盧 柟

趙王遣使幣聘盧柟往就見之王命坐諸客上曰蕞爾小國屈先生以言竊聞先生遨遊大都薦紳之士往往購先生賦有之乎對曰然有之王曰奚賦邪柟曰鄙人樸質蒙侍君子於羅太公為雲濱賦王別駕龍池賦董封君邃養賦李郡伯滄溟賦張戶部壚山賦陸大夫作夢洲賦既成大夫亟有所稱賞而王未見焉王曰可得

聞乎曰歲重光赤奮若之夕中州大夫晞嵩高俯河陰  
坐述玄之堂感牛女之故精神恍惚如將飄舉青陽微  
婉黃氣四溟乍若有喜不可究攄少焉就寢夢見二客  
造焉襲衣偉冠粲目貝齒進退尺度貌甚閑雅剪刈藉  
草坐棗樹下擢素手弄瑤芳斟饒碧飲寒漿極妙思樂  
無方爾乃乘鳴鶴之舟遊赤岸之浦超凌虛之樓憩飛  
雲之櫓髣髴杳冥若出神怪修容長髯見一道士延予  
升堂禮貌備至言笑甚驩殆昧平生詢之氏姓彊曰伯



靈舍舟而塗槩三百步石壁巨閣輝搖光燭扁稱瀛洲  
實多仙駕爾其為勢也擬其為大也磅礴軫輶砥研千  
仞嶽崿崦嶷協施邈倚緼隆豐柴岷嶧虧負遠而視之  
渾渾焉胚胚焉氤氲焉跼巖巖焉崇岳岳焉煙煜濛濛  
浮乎漢表迫而察之崦崦離纒反在水底蓬萊峙其左  
方丈崦其右員嶠阨乎水涯方壺要而不收其陽則朱  
羲清華盛夏凱焉其陰則玄靈溫風隆冬燠焉是以山  
峪魑魅之所水府龜龍之磧夏后方貢之未通大章神

度之尚沫爰有瓊璵赤瑕藍田江珠琪珣琅玕之寶綠  
碧璀璨蔭乎玄濤草則石蘭木芝荃蒨江蘺蒲葍菱藻  
藹綬綠莎木則建木若華格樨豫樟枌梓桺青梭桐沙  
棠扶疎櫛櫨被乎西東於是珍異之禽神怪之獸則有  
鳳凰鸞鷟鷦明鸛鵲鸕鷀飛鳴翔翔戶豹咆黃能  
驚鷹鷹羣雌獵顧其水濱則有獼獼水豹蛟蛇石鱗鼈  
鼉蜺蠃魴魷鯖鯁莫不噉嚼淫溶啞喋菱藕閼汜幼靡  
或左或右於是徑挂嶺之巖涉通靈之澚跨文石之橋

謁玉虛之府長髯舉方師會命童子設饌具乃有苦醢  
之美勺藥之醬滌菽肥腓九醞鬱鬯炮鼈寒螬燔雞酸  
雄山麇貍豹之胎水蟄鱗鱸之腴腥菜錯異豐融苾鬻  
千態萬殊凡所以滋神魄養血膺者充乎四隅乃使師  
涓鄒子之徒截孤竹制鳳尾控素頸流纖指吸朱脣離  
皓齒玉叫發龍吟起激清商靡流徵泣嫠婦慕放子開  
九陰除積匯大音未希列絃奮蜩拍挽逸響小大互比  
武毅揚北音滯蜚廉馳泰一嘅聲盤姍以隱約勢迅突

而爭鍛歎壯士之不返信猛厲之可喝招屈原於江潭  
起隋武於湮隧雖慷慨而莫覲其人徒心神為之搖旆  
忽東方之既白覺精魄之未沫一歎而寤筆之載記趙  
王曰善賜之絹百匹玉二穀文馬一乘盧枻攜之歸衛  
上

謹案卷十七第七頁後六行或事幾之幸會按懷  
麓堂集幸作奇


第七頁後八行隕血怨於千春按懷麓堂集血怨  
作怨血

第二十二頁前六行冬水漸兮浙浙按唐文粹水  
漸作沙飛

卷十八第二頁後二行拊琴翻朔塞之思按唐文  
粹思作音

第二頁後三行俟環玦兮思帝鄉按唐文粹俟作  
佩





總校官庶吉士臣張能照  
校對官編修臣楊壽楠  
謄錄監生臣鄒貽詩